

Headline	UUM anjur pertandingan simulasi perniagaan peringkat IPT		
MediaTitle	Utusan Malaysia (Utara)		
Date	12 Mar 2014	Language	Malay
Circulation	238,082	Readership	833,287
Section	News	Color	Full Color
Page No	26	ArticleSize	222 cm ²
AdValue	RM 2,112	PR Value	RM 6,336



UUM anjur pertandingan simulasi perniagaan peringkat IPT

ALOR SETAR 11 Mac - Universiti Utara Malaysia (UUM) menerusi Institut Pembangunan Keusahawanan dan Koperasi (CEDi) dan Kementerian Pendidikan menganjurkan pertandingan Simulasi Perniagaan Institusi Pengajian Tinggi (IPT) peringkat kebangsaan kali ketiga baru-baru ini.

Pengarah Eksekutif CEDi, Profesor Madya Dr. Abdul Rahim Othman berkata, pertandingan itu juga yang mendapat kerjasama Malaysia Practice Enterprise Centre (MyPEC) disertai 95 peserta daripada 19 IPT yang terdiri daripada 15 IPT awam, tiga politeknik dan satu IPT swasta.

Katanya, pertandingan yang berlangsung di Pusat Simulasi Perniagaan CEDi itu bertujuan menyediakan platform untuk mahasiswa merasakan sendiri suasana menjalankan perniagaan sebenar melalui pengurusan perniagaan.

"Terdapat peningkatan jumlah IPT yang bertanding dan jumlah industri yang terlibat pada pertandingan kali ini juga meningkat berbanding penganjuran sebelum ini.

"Pada kali ini 20 industri akan bertanding dan pada kali ini juga penyertaan dibuka kepada Politeknik Premier dan IPTS di negara ini," katanya di sini baru-baru ini.

Menurut Abdul Rahim, pihaknya berharap penganjuran program tersebut dapat diadakan di peringkat serantau pada masa akan datang.

"UUM adalah satu-satunya universiti di negara ini yang menganjurkan pertandingan ini dan saya berharap pertandingan ini dapat diperluaskan ke peringkat serantau melibatkan universiti-universiti dari rantau Asia Tenggara," ujarnya.

Dalam pada itu, Timbalan Pengarah CEDi, Profesor Madya Dr. Chandrakantan Subramaniam berkata, program itu merupakan satu program perkongsian bijak yang dapat membawa kebaikan kepada peserta.

"Program ini dapat merealisasikan objektif membentuk modal insan yang lebih berdaya saing dalam kerjaya masing-masing termasuklah jika para peserta ingin bergiat secara-serius dalam bidang perniagaan," katanya.



SEBAHAGIAN daripada peserta yang mengambil bahagian dalam pertandingan Simulasi Perniagaan Institusi Pengajian Tinggi (IPT) Peringkat Kebangsaan di UUM Sintok, baru-baru ini. - IHSAN UUM